

Rozáriu ho S. José

MISTÉRIU DOLOROZU

1. Ita kontempla S. José nia disponibilidade atu husik ninia noiva.

“Jose husu nanis ona atu kaben ho Maria, Jesus nia inan. Molok sira moris hamutuk, Maria ko’us tiha ona hodi Espiritu Santu nia kbiit. Nia laen Jose, ne’ebé ema diak no lakohi hamoe Maria, hakotu atu husik deit nia.” (Mt 1,18-19).

- **Ita harohan ba Aman Maromak**, ne’ebé gia S. José iha loron sira prova nian no ita dehan ba Nia nu’udar membru sira ninia família nian: **Ami Aman...**
- **Ita harohan ba Maria**, ne’ebé S. José ho hakmatek no silénsiu falun nia iha ninia maternidade milagroza, atu inan-aman sira, hodi tuir S. José nia ain-fatin, halo sira nia moris no sira-nia serbisu, sakrifísiu ida, kolaborasaun ida atu kumpre mistériu Inkarnasaun no misaun salvasaun nian (kf Redemptoris Custos n. 8): **Ave Maria 10...**
- **Ita fó glória ba Maromak Trindade**, ne’ebé hatama S. José iha aliansa, ne’ebé nia halo ho Abraão (11), no ita harohan ho gratidaun: **Glória ba Padre...**

2. Ita kontempla Simeaun nia profesia Jezús nia terus nian, ne’ebé S. José rona iha momentu apresentasaun ninia oan hakiak nian.

“Labarik nia aman inan sira hakfodak ho buat ne’ebé nia dehan kona ba Nia. Simeão fo bensa ba sira, hodi dehan ba nia inan Maria: “Haree ba, labarik ne’e mosu mai atu hatun no foti ema barak iha Israel, no mos atu sai sinal ida ne’ebé halo ema nia lia la tuir malu; no surik ida sei sona borus ita nia fuan, atu fo sai buat ne’ebé ema barak hanoin iha sira nia laran” (Lc 2,33-35).

- **Ita harohan ba Aman Maromak**, ne’ebé halo José matenek iha terus, no ita dehan ba nia nu’udar membru sira ninia família nian: **Ami Aman...**
- **Ita harohan ba Maria**, ne’ebé S. José tulun iha ninia terus ba futuru dramátiku nia Oan nian, atu ema hotu tau iha servisu, kapasidade umana hotu, iha espíritu saran an nian, hanesan S. José halo, atu serví Mesias (RC n. 8) **Ave Maria 10 ...**
- **Ita fó glória ba Maromak Trindade**, ne’ebé prepara mós iha S. José nia oin maksoin ba ema hotu no ita dehan ho gratidaun: **Glória ba Padre...**

3. Ita kontempla S. José nia susar, bainhira nia rona, iha mehi, Erodes nia hakaran no hahalok kontra Kosok-Oan Jezús.

“Hamriik ba, lori kiik oan ho nia inan, halai ba Egipto hodi hela iha ne’ebá to’o ha’u fo hatene ba o, basa Herodes sei buka Kiik oan ne’e atu oho” (Mt2,13)

- **Ita harohan ba Aman Maromak** ne’ebé halo José sai obediente ba anju nia lia, no ita dehan ba Nia nu’udar membru sira ninia família nian: **Ami Aman...**
- **Ita harohan ba Maria**, ne’ebé iha kabon ida hanesan José, laran-metin iha Maromak nia promesa sira, atu ema ida-idak hatene banati tuir S. José nia exemplu, tuir ida-idka nia estadu moris nian: **Ave Maria (hananu)...**
- **Ita fó glória ba Maromak Trindade**, ne’ebé entrega ba José depózitu ninia mistériu domin salvasaun nian (RC n.15), no ita dehan ho gratidaun: **Glória ba Padre...**

4. Ita kontempla S. José nia terus bainhira nia tenke halai ho ninia família iha Egipto.

“Nia hader iha kalan, lori Kiik oan ho nia inan halai ba Egípto, hodi hela iha ne’ebá to'o Herodes mate” (Mt 2,14-15).

- **Ita harohan ba Aman Maromak**, ne’ebé proteje José atu nia proteje Kosok-Oan Jezús, no ita dehan ba Nia nu’udar membru sira ninia família nian: **Ami Aman...**
- **Ita harohan ba Maria**, ne’ebé hetan di’ak husi S. José nia servisu aman no protetór nian hala’o ho badinas, atu família hotu bele rekoñese no moris tuir santidade loroloron nian, hodi foti exemplu husi Santa Família Jezús, José no Maria nian (RC n. 7.24): **Ave Maria...**
- **Ita fó glória ba Maromak Trindade**, ne’ebé bolu José atu koopera iha salvasaun hodi ninia paternidade legál (RC n.17), no ita dehan ho gratidaun: **Glória ba Padre...**

5. Ita kontempla S. José nia laran-susar, fahe ho ninia kabén María, tanba lakon Jezús iha templu.

“Festa hotu tiha, sira fila hikas ba uma, maibé Jezús hela iha Jerusalem; nia aman sira la hatene. Liu tiha loron tolu, sira hetan fali Nia iha templu, tur hela iha ema matenek sira leet. Haree tiha Nia, nia aman sira hakfodak teb-tebes. Nia inan hateten ba Nia: “...Ó nia aman ho ha’u neon susar teb-tebes hodi buka Ó” (Lc 2, 43.48).

- **Ita harohan ba Aman Maromak**, ne’ebé entrega ba S. José ninia Ida-ne’ebé nia hadomi liu, no ita dehan ba nia nu’udar membru sira ninia família nian: **Ami Aman...**
- **Ita harohan ba María**, ne’ebé hetan iha José apoiu válidu iha ninia laran susar, atu ita mós iha fidelidade no pureza fuan nian hanesan ida-ne’ebé anima S. José, bainhira serví Liafan halo an ba ema (RC n. 31): **Ave María...**
- **Ita fó glória ba Maromak Trindade**, ne’ebé hein husi Foin-sa’e Virgen María, hamutuk ho nia kabén ne’ebé hakotu ona, S. José (18), no ita dehan ho gratidaun: **Glória ba Padre...**

INVOKASAUN LADAIÑA NIAN:

S. José, Maromak Oan nia aman (RC n. 8), **harohan mai ami.**

S. José, Jezús nia aman hakiak (22), **harohan mai ami.**

S. José, aman domin liu (31), **harohan mai ami.**

S. José, sasin kona-ba bibi-atan sira nia tuku-tuur hanai (10), **harohan mai ami.**

S. José, sasin kona-ba Liurai sira mai husi Loro-sa’e nia tuku-tuur hanai (10), **harohan mai ami.**

S. José, Jezús nia edukadór (16), **harohan mai ami.**

S. José, peregrinu hamutuk ho Jezús no María bá Jerusalém (15), **harohan mai ami.**

S. José, Maksoin nia mahein (1), **harohan mai ami.**

S. José, mahein, xefe no defensór Família divina nian (28), **harohan mai ami.**

S. José, ministru salvasaun nian (8), **harohan mai ami.**